



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 30. redovnoj sjednici održanoj 23. maja 2018. godine, usvaja

ZAKON
O IZMJENAMA I DOPUNAMA ZAKONA O UPRAVNOM POSTUPKU
BRČKO DISTRIKTA BOSNE I HERCEGOVINE

Član 1

U Zakonu o upravnom postupku Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 48/11), mijenja se član 1 koji glasi:

„Član 1

- (1) Zakonom o upravnom postupku Brčko distrikta Bosne i Hercegovine (u daljnjem tekstu: Zakon) uređuju se pravila na osnovu kojih organi javne uprave Brčko distrikta Bosne i Hercegovine (u daljnjem tekstu: organi uprave) u okviru djelokruga utvrđenog na osnovu zakona, postupaju i rješavaju u upravnim stvarima.
- (2) Po ovom zakonu dužna su postupati i preduzeća, institucije, ustanove i druga pravna lica kad u obavljanju javnih ovlaštenja (u daljnjem tekstu: institucije koje imaju javna ovlaštenja) koja su im povjerena zakonom, odlukom ili ugovorom, rješavaju u upravnim stvarima.“

Član 2

Iza člana 1 dodaje se novi član 1a, koji glasi:

„Član 1a

Upravna stvar, u smislu ovog zakona, jeste svaka pojedinačna situacija u kojoj nadležni organ, neposrednom primjenom propisa iz odgovarajuće upravne oblasti, rješava o pravima, obavezama ili pravnim interesima fizičkih lica ili pravnih lica ili drugih stranaka.“

Član 3

U članu 17 stav 1 mijenja se i glasi:

„(1) Organ, u smislu ovog zakona, podrazumijeva organe javne uprave, Skupštinu Brčko distrikta Bosne i Hercegovine i institucije koje imaju javna ovlaštenja, koji rješavaju u upravnim stvarima.“

Član 4

U članu 26 stav 1 mijenja se i glasi:

„(1) U upravnoj stvari za čije je rješavanje nadležan organ, rukovodilac tog organa ili službena osoba iz nadležnog organa koju ovlasti rukovodilac organa donosi rješenje u upravnom postupku.“

U stavovima 2 i 3 riječi: „Šef Odjeljenja“ zamjenjuju se riječima: „Rukovodilac organa“.

Iza stava 3 dodaju se novi stavovi 4 i 5, koji glase:

„(4) Izuzetno od stava 1 ovog člana, u slučaju opravdane odsutnosti rukovodioca organa javne uprave, rješenje u upravnom postupku donosi osoba iz nadležnog organa koju ovlasti gradonačelnik Brčko distrikta Bosne i Hercegovine.

(5) Izuzetno od stava 2 i 3 ovog člana, u slučaju opravdane odsutnosti rukovodioca organa javne uprave, rješenje o ovlaštenju donosi osoba iz nadležnog organa koju ovlasti gradonačelnik Brčko distrikta Bosne i Hercegovine.“

Član 5

U članu 75 stavu 3 broj: „54“ zamjenjuje se brojem: „41“.

Član 6

Član 196 mijenja se i glasi:

„Član 196

- (1) Rješenje potpisuje rukovodilac organa ili službena osoba iz nadležnog organa koju ovlasti rukovodilac organa.
- (2) Izuzetno, u slučaju opravdane odsutnosti rukovodioca organa javne uprave, rješenje potpisuje osoba iz nadležnog organa koju ovlasti gradonačelnik Brčko distrikta Bosne i Hercegovine.“

Član 7

U članu 208 stav 1 mijenja se i glasi:

„(1) Protiv prvostepenog rješenja stranka ima pravo izjaviti žalbu, ako ovim ili posebnim zakonom nije propisano da žalba nije dopuštena.“

Član 8

Iza člana 209 dodaju se novi članovi 209a i 209b koji glase:

„Član 209a

- (1) Stranka se može odreći prava na žalbu u pisanom obliku ili usmeno na zapisnik, najkasnije do dana isteka roka za izjavljivanje žalbe.

- (2) Odricanje od prava na žalbu u upravnim stvarima u kojim učestvuju dvije ili više stranaka ima pravni učinak samo ako se sve stranke odreknu prava na žalbu.
- (3) Odricanje od prava na žalbu ne može se opozvati, o čemu stranka mora biti upoznata.
- (4) Danom dostave podneska ili danom usmene izjave na zapisnik o odricanju od prava na žalbu, prvostepeno rješenje postaje konačno, izvršno i pravosnažno.

Član 209b

- (1) Stranka može odustati od žalbe sve do donošenja odluke po žalbi.
- (2) Kad stranka odustane od izjavljene žalbe, postupak po žalbi obustavlja se zaključkom.
- (3) Odustanak od žalbe ne može se opozvati.“

Član 9

Član 211 mijenja se i glasi:

„Član 211

Žalba protiv rješenja podnosi se u roku od 15 dana od dana dostave rješenja, ako zakonom nije drugačije određeno.“

Član 10

Član 213 mijenja se i glasi:

„Član 213

- (1) U žalbi se mora navesti rješenje koje se pobija, naziv organa koji je donio pobijano rješenje, broj i datum rješenja i zbog čega stranka nije zadovoljna pobijanim rješenjem i potpis žalioca.
- (2) Žalba ne mora biti obrazložena.
- (3) Podnesak i kad nije označen kao žalba, smatra se kao žalba ako iz njegovog sadržaja proizlazi jasna namjera stranke da pobija rješenje.
- (4) U žalbi se mogu iznositi nove činjenice i novi dokazi, a žalilac je dužan da obrazloži zbog čega ih nije iznio u prvostepenom postupku.
- (5) Kad se u žalbi iznose nove činjenice i novi dokazi, a u postupku sudjeluju dvije ili više stranaka s protivnim interesima, svakoj stranci dostavlja se prijepis žalbe i daje rok za izjašnjavanje o novim činjenicama i dokazima.
- (6) Rok iz stava 5 ovog člana ne može biti kraći od osam ni duži od 15 dana.“

Član 11

Član 219 mijenja se i glasi:

„Član 219

- (1) Kad prvostepeni organ koji je donio rješenje utvrdi da je podnesena žalba dopuštena, pravovremena i izjavljena od ovlaštenog lica, a nije u skladu s odredbama članova od 216 do 218 novim rješenjem zamijenio rješenje koje se žalbom pobija, dužan je bez odgađanja, a najkasnije u roku od osam dana od dana prijema žalbe ili odgovora na žalbu, žalbu proslijediti Apelacionoj komisiji na daljnji postupak.
- (2) Prvostepeni organ dužan je uz žalbu priložiti sve spise koji se odnose na predmet.
- (3) Prvostepeni organ može uz žalbu i spise predmeta dati i odgovor na navode žalbe.
- (4) Kad u postupku sudjeluju dvije stranke ili više stranaka s protivnim interesima, žalba se dostavlja na odgovor svim strankama, te im se određuje rok za odgovor na žalbu.
- (5) Rok iz stava 4 ovog člana ne može biti kraći od osam ni duži od 15 dana.“

Član 12

U članu 231 stavu 2 broj: „11“ zamjenjuje se brojem: „10“.

U stavu 3 broj: „11“ zamjenjuje se brojem: „10“.

Član 13

U članu 233 stavu 1 tački 5 riječi: „tački 9, 10 i 11“ zamjenjuju se riječima: „tački 9 i 10“.

Član 14

U članu 250 stavu 2 iza tačke 4 dodaje se tačka 5 koja glasi:

„5. danom odricanja prava na žalbu.“

Član 15

U članu 281 stavu 1 tački 9 broj: „153“ zamjenjuje se brojem: „203“.

Član 16

Ovaj zakon stupa na snagu osmog dana od dana objave u Službenom glasniku Brčko distrikta Bosne i Hercegovine.

Broj: 01-02-389/18
Brčko, 23. 5. 2018. godine

PREDSJEDNIK
SKUPŠTINE BRČKO DISTRIKTA BiH

Esed Kadrić